

Ekwo-ozì K'èbo, Pòlu Deru Nù Ndu  
**Tesalonayika**

<sup>1</sup> Ekwo-ozì-a shì l'èka mbèdua, bụ Pòlu alaru Chìochi Tesalonayika, bụ ndu kẹ Chileke, bụ Nna anyi bya abụru kẹ Nnajiuphu, bụ Jizọsu Kéreshi. Ndu anyi ẹphe gba mgba ede iya bụ Sulivanusu yẹ Timoti.

<sup>2</sup> Gẹ Chileke, bụ Nna yẹ Nnajiuphu, bụ Jizọsu Kéreshi meeru unu eze-iphe-oma; mekwaphọ g'unu buru guu.

*Ikpe, Kéreshi e-kpe mẹ ọ -byalẹpho*

<sup>3</sup> Ụnwunna anyi; ọ buakwa iphe, anyi mefuta je l'anyi a-nọdujeepho ekele Chileke ekele ẹhu unu tekenteke; kẹle ọ bụ iphe, gbaru anyi l'ememe. Noo kẹle ekwekwe, unu kweru kẹ Chileke bẹ kwatakpoọ akaepho eshihu ike eje; nokwaphọ gẹ n-yemobu, unu yeru nwibe unu l'ẹhu l'ẹhu akaepho shii akaka eje. <sup>4</sup> Noo iphe, anyibedua l'onwanyi egudeje unu aba abaa l'iphe, bukpoo Chìochi Chileke. Ishi aba abaa ono bụru l'unu sụru ẹka l'obu kweshia ike l'iphe, unu kweru; l'ewere ono, e mekotakpooru unu ono; mẹ l'iphe-ẹhuka ono, unu jekotakpooru ono.

<sup>5</sup> Ono bụru iphe, unu e-gudekwanu ẹka maru l'ọ bụ ọkpobe-opfu lẹ Chileke ekpeje ikpe, pfulu ọto. Ọo iphemiphe ono, l'eme l'ẹhu unu ono l'e-me unu agbaa k'abahụ l'èka Chileke bụ eze, bụ iya bụ iphe ọbu, unu anwu ọnwu iya nta-a. <sup>6</sup> Chileke bẹ bụ onye l'emeje iphe, pfulu ọto; mbụ l'iphe, bụ ndu ono, meru unu nọdu eje iphe-ẹhuka ono bẹ oo-mekwaphọ ẹphe ejee iphe-ẹhuka. <sup>7</sup> Unubèdua ọbu, aakpa ẹhu nta-a bẹ oo-me unu enweru onwunu. Nokwaphọ g'oo-me anyibedua. Teke

oo-me iphe ono be bu teke Nnajiuphu a-nodu l'oku enwu phoopphoo shi l'imigwe abya yee unwu-ojozi-imigwe iya ono, bu phe l'e-goshi g'ike iya habe shii ono. <sup>8</sup> Oo bya agwaa ndu amadu Chileke ochi; waa ndu te emedu iphe, ozi-oma ehu Nnajiuphu anyi, bu Jizosu Kereshi epfu ono. <sup>9</sup> Ndu ono be a-nu chiipfu bya achifu phe l'iphu Nnajiuphu me l'odu-biribiri du l'ike iya; je dobe l'eka ephe a-nodu laa l'iswi jasu l'ojejoje. <sup>10</sup> Noo iphe, e-me mboku ono, oo-bya. Oo ya bu ge ndu nkiya, bu ndu kwehawaru nkiya akwabe iya ubvu; jakwaa ya pho ajaja. Unubedua l'onwunu anodukwapho l'eka ono, ndu nkiya no ono; kele unu kwetaru k'ozi ono, anyi byaru ezia unu ono.

<sup>11</sup> Noo g'o gude anyi nodu anodujeepho epfu anu Chileke l'iswi ehu unu tekenteke; g'o mee unu g'unu du k'anodu ndzu ono, o kuru unu g'unu nodu ono. Unu aduje ike meje iphe, du ree, l'agu unu egu ememe. L'o mekwaapho g'o dzua oke; mbu ndzu ono, unu no; opfu l'unu kweru nkiya ono. <sup>12</sup> Oo ya bu; g'ee-shi l'eka unu kwabe ephe Nnajiuphu anyi, bu Jizosu Kereshi ubvu; Chileke eshikwanu Nnajiuphu anyi, bu Jizosu Kereshi l'eka kwabe unubedua ubvu. Iphemiphe ono be Chileke e-shikota l'eze-iphe-oma, oome me ke Nnajiuphu anyi, bu Jizosu Kereshi mekota.

## 2

### O-chi-nta Kereshi

<sup>1</sup> A bya abya le k'abyabya ke Nnajiuphu anyi, bu Jizosu Kereshi me k'edzuko, oo-me g'anyi dzukobe g'anyi l'iya tugba buru nanu anyi nodu arwo unu unwunna anyi su; <sup>2</sup> g'o to tufu-kebekwa unu ehu l'oriri; ophu obu awatakebekwa ete unu ophe; opfu l'a suru unu le mboku ono, Nnajiuphu a-bya ono eruwaa. Unu te eyejekwa

Ọnu m'obeta o nweru onye byaru bya asụ unu l'ọo iphe, Unme-dụ-Nsọ pfuru bẹ ya l'epfu; ọzoo l'ọ kwa iphe, nemadzụ pfuru iya bẹ ya epfu; ọzoo l'e deru iya l'ekwo-  
 ozi, a sụru l'ọo anyịbedua deru. <sup>3</sup> G'ọ tọ dukwa onye e-  
 duswe unu ụzo; kẹle mbọku ono ta abyakwa abya abụdu  
 lẹ teke ono, ndiphe e-kwefuru Chileke ike ono vuadaru  
 ụzo bya; mẹ teke ọ byaadaru mbụ nwa-ogbuka-ekemu  
 ono, bụ iya bụ onye ono lafuta l'iswi ono. <sup>4</sup> Ọ -byaepho  
 bẹ ọo-sụ l'ọo-buru kẹ yẹ iphemiphe, ndiphe ekupọo  
 chi g'ọ ha; mẹ iphemiphe ndiphe abarụ ẹja. Oo-woru  
 onwiya dobe lẹ ya kakota iphemiphe ono shii. Mbụ; oo-  
 jechakwaa je asugabe onwiya l'eze-ulo Chileke sụ l'ọo  
 yẹbedua bụ Chileke l'onwiya.

<sup>5</sup> ? Unu ta nyataheduru lẹ mu pfuhawaru iya unu  
 teke anyi l'unu tukuroru nọdu? <sup>6</sup> Unubedua l'onwunu  
 makwaru-a iphe, akposhi iya abyabya nta-a. Ọ kwa  
 k'ophu a-huma iya teke gbaru iya nụ <sup>7</sup> Ike ono, a ta  
 humadu l'anya ono, bụ ike kẹ nwa-ogbuka-ekemu ono  
 nọdu erekwanu ire nta. Ọle yẹbedua l'onwiya ta abyadu  
 abya jeye teke onye ono, sedekwaduru iya nụ ono l'e-  
 tochiru iya. <sup>8</sup> O -tochieru iya pho ono; ọo ya bụ nwa-  
 ogbuka-ekemu ono abya teke ono; l'aa-huma-dzuru iya.  
 E mechaepho; Nnajiuphu, bụ Jizosu egude uphere ọnu  
 iya gbua ya. Ọ buru nwijnwii ono, Nnajiuphu a-nọdu  
 egbu teke l'ọo-bya ono bẹ bụ mkpakọ-iphe l'e-me nwa-  
 ogbuka-ekemu ono l'ọ laa l'iswi. <sup>9</sup> Abyabya, nwa-mgbuka-  
 ekemu ono a-bya bẹ bukwa l'ike kẹ Nsetanu bẹ oo-shi  
 l'eka. Ọ -bya l'o meshiahaa iphe, dū biribiri, dūgbaa  
 iche iche, bụ iphe, a-kpọ ndiphe opfu. Nokwapho g'oo-  
 gude ugho emegbaa iphe-ohumalenya, dū biribiri. <sup>10</sup> Oo-  
 gude ẹjo ugho mgbashi gude eduphushi ndu ono, bụwaa  
 ndu l'a-la l'iswi ono. Iphe, ephe e-gude laa l'iswi ono a-  
 buru l'ephe jikaru l'ephe ta akpọduru obu eye l'okpobe-

opfu ono, bu iya gege adzota phe nu ono. <sup>11</sup> Noo iphe, meru g'o gude Chileke gbahaa phe eka; ephe shiswee uzo; shiswee ya k'ophu bu ephe iphe, abudu okpobe-opfu be ephe ekwetaje l'o bu okpobe-opfu. <sup>12</sup> Eka o wukoru bu l'iphe, bukpo ndu ono, ekwetaduru okpobe-opfu ono; o buchiaru ejo-iphe ka phe utso ono be Chileke a-nmakota ikpe.

### Apfuru pfushia ike

<sup>13</sup> Unwunna anyi; Nnajiuphu yekwaru unu obu. O buakwa iphe, anyi mefutaje; l'anyi a-nodujeephe ekele Chileke ekele ehu unu tekenteke; kele Chileke shiepho le mbu hota unu k'ophu oo-dzota unu; mbu o jekwa e-shi Unme-du-Nso ono l'eka l'ere ire l'ehu unu ono; waa l'ekwekwe ono, unu kweru l'okpobe-opfu ono; dzoo unu. <sup>14</sup> Oo iphe ono be o shi l'eka ozi-oma ono, anyi ziru unu ono kua unu oku iya; g'unu le Nnajiuphu anyi, bu Jizosu Kereshi gbaru mgbaweru odu-biribiri iya. <sup>15</sup> Noo ya bu; unwunna anyi; unu pfuru pfushia ike; unu gudeshikwa okpobe-opfu ono, anyi ziru unu ono; me anyi gude onu zia ya unu-o; me anyi deru iya unu edede l'ekwo-ozu.

<sup>16</sup> Ge Nnajiuphu anyi, bu Jizosu Kereshi l'onwiya; yele Chileke, bu Nna anyi, bu onye yeru anyi obu; bya emee g'obu shihu anyi ike jasule tuutuutuule mimiimii; meeru unu anyi eze-iphe-oma; mekwaarupho anyi iphe ono, anyi ele enya iya ono. <sup>17</sup> G'o mee g'obu shihu unu ike; mekwaapho unu g'unu shihu ike suru k'eme iphe, du ree, unu emekpo ememe; pfuje iphe, du ree l'onu.

## 3

### Aarwo g'epfuru nu Chileke

<sup>1</sup> Eka anyi a-sube opfu ono ishi unwunna anyi buru; g'unu pfuje nuru anyi Chileke g'ozu-oma ke Nnajiuphu

kabaa edzuru ekameka egwegwa; g'a kwabejekwapho ozi-oma ono ubvu l'ekameka egube ono, unu akwabeje iya ono. <sup>2</sup> Wafua g'ọ nafutaje anyi l'eka ndu iwe me l'eka ndu ejo-iphe. Noo kele ọ tọ bubedu ndiphe l'ophu be kwetarū k'ozi-oma ono.

<sup>3</sup> Obenu le Nnajiuphu bu onye apfushije ike l'iphe, o pfuru. Ọo ya bu onye e-me g'unu shihu ike; teme l'o chekwapho unu g'eka Onye-Njo ono te erwu unu l'ehu. <sup>4</sup> Anyibedua be Nnajiuphu meakwaru ophu anyi awaheduru unu obu mini. O doru anyi enya l'unu eme-a iphe, anyi suru g'unu meje; teme unu je l'e-meru iya kwaseru.

<sup>5</sup> Ge Nnajiuphu kpo-ziaru unu uzo k'ophu unu akabaa anodu eye Chileke obu eje l'iphu; me k'ophu ata nshi unu l'a-bu ophu shi Kereshi l'eka.

### *Ozi Nnajiuphu, e jefutaje*

<sup>6</sup> Unwunna anyi; iphe, anyi no Nnajiuphu anyi, bu Jizosu Kereshi l'eka epfuru unu nta-a bukwa; g'unu bujeru ubara yeru iphe, bukpo nwanwa, enyiru ozi du; ophu o mejedu iphemiphe ono, anyi ziru unu g'unu meje ono. <sup>7</sup> Noo l'unubedua be maru-a l'unu nwufutaje eka anyi. Anyi te eshikwa buru ndu enyiru ozi teke anyi l'unu shi nodukota. <sup>8</sup> O tọ dukwa onye anyi natajeru nri ria ke mmanu. O chia iphe, anyi shi emechia bu l'anyi shi esekotaje akanya eswe l'enyashi jasū ike labo abvu anyi; g'ọ tọ du g'unu ha onye anyi a-pata mkpa ehu anyi je ebo g'ọ buru iya ivu-erwa. <sup>9</sup> Iphe, anyi shi eme iya ta abukwa l'ọ tọ gbaduru anyi g'anyi a-su g'unu vuru mkpa ehu anyi. O kwa g'anyi gude umere anyi goshi unu iphe, unu e-letaje eme. <sup>10</sup> Mbū lufuchakwa le teke anyi no l'ibe unu be anyi pfuakwaru unu iphe-a pfushia ya ike su: “G'onye ete kwedu eje ozi te erijekwa nri.”

<sup>11</sup> Iphe, anyi gude nọdu epfu iphe-a bụ l'anyi nụmawaru l'o nweru g'unu ha ndu haru buru ndu enyiru ozi du; ndu buepho iphe, ephe nọ bụ o-jeru-opfu, 'e kuduru phe; ophu o dudu iphe ozo, ephe anoduje eme.

<sup>12</sup> Anyi nọ Nnajiuphu, bụ Jizosu Kéreshi l'eka akaru egube ndu ono alokwaru phe pho eka le nchi su g'ephe nọdukwapho nwa doo seje akanya l'onwophe seta iphe, ephe e-gude buru. <sup>13</sup> Su-a; unwunna anyi; g'ike ta abukwa unu l'eme iphe, du ree.

<sup>14</sup> Teke o bụ l'o duru onye jikaru emeje iphemiphe-a, anyi deru l'ekwo-ozu-a; unu hubekwa onye obu ama. Unu wuchia ya ewuchi; g'e gude nno g'iphere a-du iya. <sup>15</sup> Ole g'unu te emejekwa iya g'onye unu l'iya duru l'opfu. Unu gudeje iya loo ya eka le nchi; kele o bukwa nwanna unu.

*Opfu, mkpochi-ishi*

<sup>16</sup> Ge Nnajiuphu l'onwiya, bụ iya be ehu-odu-guu l'eshije l'eka mekwaa g'ehu dujekpoepho unu gubala tekenteke; me l'ekameka. Ge Nnajiuphu swikwaru unu eswiru g'unu ha.

<sup>17</sup> Ekele-a, du l'ekwo-ozu-a be bu mbedua, bu Polu gude eka mu dee ya. Owa-a buakwaa ge mu edeje iphe edede. Oo ya bu iphe, unu e-gudeje hube ekwo-ozu, mu deru ama.

<sup>18</sup> Ge Nnajiuphu anyi, bụ Jizosu Kéreshi meeru unu eze-iphe-oma g'unu hakota. Nokwa g'o du.

Bayıburu Izii  
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d